

四庫全書

子部

欽定四庫全書

冊府元龜卷一百九十五 宋 王欽若等 撰

閏位部

惠民 仁愛 恤征役

惠民

書稱先王之德曰保惠於庶民又曰子惠困窮又曰惠鮮鰥寡蓋恤艱周急資無賑乏歷代之令典也漢道既衰方國列峙咸能撫養萌庶救其窮絕發倉廩之積弛

山澤之禁給糧種以資其用廢林苑以還其主用能消弭災沴保集流徙使下無菜色而安於土著者由茲道也然而秦號富强蜀稱天府施惠濟衆史無其傳故今之詮次始於江左終於朱氏云

吳大帝赤烏三年十一月民饑詔開倉廩以賑貧窮十三年八月丹陽句容及故鄣寧國諸山推鴻水溢詔原逋債給貸種食

宋高祖永初三年三月秦雍流戶悉南入梁州送紵絹

萬疋荆雍州運米委州刺史隨宜給賦

文帝元嘉五年正月京邑大火遣使巡慰賑賜

六月以京師大水遣使檢行賑贍

十二年六月丹陽淮南吳興義興大水京邑乘船以徐
豫南兗三州會稽宣城二郡米穀百萬斛賜五郡遭水
民

十八年五月沔水汎濫六月戊辰遣使巡行賑贍

十九年閏五月京邑雨水遣使巡行賑贍

二十年諸州郡水旱傷稼民大饑遣使開倉賑卹給賜糧種

二十一年正月大赦詔諸逋債在十九年以前一切原除去歲失收者疇量申減尤弊之處遣使就郡縣隨宜賑恤凡欲附農而糧種匱乏者竝加給貸

六月連雨水丁亥詔曰霪雨彌月水淹為患百姓積儉致茲乏匱二縣官長及營署部司各隨統檢實給其柴米必使周悉

二十五年正月詔曰比冰雪經旬薪粒踊貴貧弊之室多有窘罄可檢行京邑二縣及營署賜以柴米

二十九年正月詔曰經寇六州居業未立仍值災澇饑困薦臻可速符諸鎮優量救卹今農事行興務盡地利若須田種宜隨給之

六月以京邑雨水詔部司巡幸賜樵米給船

三十年正月青徐州饑二月壬子遣運部賑卹

孝武孝建二年八月癸酉以三吳民饑詔所在賑貸

丙子詔曰諸苑禁制綿遠有妨肆業可詳所開弛假與貧民

大明元年正月京邑雨水辛未遣使檢行賜以樵米

五月吳興義興大水民饑乙卯遣使開倉賑恤

二年正月詔曰去歲東土多經水災春務已及宜加優課糧種所須以時貸給

二月詔曰政道未著俗弊尚深豪侈兼併貧弱困窘存闕衣裳沒無斂榷朕甚傷之其明勅守宰勤加存恤賻

贈之科速為條品

九月襄陽大水遣使巡行賑贍

四年八月雍州水甲寅遣使運部賑恤

五年七月詔曰雨水猥降街衢泛溢可遣使巡行窮弊之家賜以薪粟

七年八月以歲不稔詔尤弊之家開倉賑給

九月詔曰近炎精亢序苗稼多傷今三麥未晚甘澤頻降可下東境郡勤課墾殖尤弊之家量貸麥種

十月南巡豫州詔曰雖秋澤頻降奈夏旱嬰弊可即開倉竝加賑賜

八年二月詔曰去歲東境偏旱田畝失收使命來者多至之絕或下窮流冗頓伏街巷朕甚憫之可出倉米付建康秣陵二縣隨宜贍恤若濟拯不時以至捐棄者嚴加糾劾

前廢帝大明八年閏五月即位八月以京師雨水遣御史與官長隨宜賑恤

明帝泰始二年六月京師雨水遣殿中將軍檢行賜卹
三年閏正月京師大雨雪遣使巡行賑賜各有差

後廢帝以秦豫元年四月即位六月京師雨水詔賑卹
二縣貧民

元徽元年六月壽陽大水遣殿中將軍賑卹慰勞

三年三月以京師大水遣尚書郎官長檢行賑賜

四年正月躬耕籍田貸貧民種糧

南齊太祖建元二年二月遣大使巡慰淮肥徐豫邊民

尤貧造難者刺史二千石量加賑卹

武帝以建元四年即位三月庚辰詔曰比來未稔貧窮不少京師二岸多有其弊遣中書舍人優量賑卹

五月癸未詔曰頃水雨頻降潮流薦滿二岸居民多所淹浸遣中書舍人與兩縣官長優量賑卹

永明五年正月詔曰朕昧爽丕顯思康民瘼雖年穀屢登而饑饉代有今履端肇運陽和告始宜協時休覃茲黎庶諸孤老貧病竝賜糧餼遣使親賑每存均普

六月詔曰比霖雨過度水潦存溢京師居民多罹其弊遣中書舍人二縣官長等隨宜賑賜

八年八月詔曰京師霖雨既過居民汎濫遣中書舍人二縣官長賑卹

十月丁丑詔吳興水潦過度開所在倉賑賜

十年十一月詔曰頃來霖雨樵糧稍貴京邑居民多罹其弊遣中書舍人二縣官長賑賜

十一年六月壬午詔霖雨既過遣中書舍人二縣官長

賑賜京邑居民

七月丁巳詔曰頃風水為災二岸居民多罹其患加以貧病六疾孤老稚弱彌足矜念遣中書舍人履行沾卹明帝建武元年十一月詔省新林苑先是民地悉以還主原責本直

東昏侯永元三年六月京邑雨水遣中書舍人二縣官長賑賜有差

梁高祖天監七年九月丁亥詔曰芻牧必往姬文垂則

雉兔有刑姜宣致貶藪澤山林毓材是出斤斧之用比
屋所資而頃世相承竝加封國豈所謂與民同利惠茲
黔首凡公家諸屯戍世見封燠者可悉開常禁

十六年正月南郊詔曰朕當宸思治政道未明昧旦劬
勞亟移星紀今太皞御氣勾芒首節升中就陽禋敬克
展務承天休布茲利澤尤貧之家勿收今年之調其無
田業者所在量宜賦給若民有產子即依格優蠲孤老
鰥寡不能自存咸加賑卹

普通元年正月乙亥改元大赦詔曰鰥寡孤獨竝加賑
卹

陳高祖永定三年閏四月庚寅詔曰開廩贍絕育民之
大惠巡方卹患前王之令典朕當斯季俗膺此樂推君
德未孚民瘼猶甚重茲多壘彌疚納隍良繇四聰弗達
千里勿應博施之仁何其有爽殘弊之軌致此未康吳
州晉州去歲蝗旱郢田雖祝鄭渠終涸室靡盈積之望
家有填壑之嗟百姓不足兆民何賴近已遣中書舍人

江德藻銜命東陽與令長二千石問民疾苦仍以入臺
倉見米分恤雖德非既飽庶微慰阻饑

東魏孝靜天平元年十月遷都於鄴出粟一百三十萬
以賑貧人是時六坊之衆從武帝而西者不能萬餘人
皆北從竝給常廩春秋二時賜帛以供衣服之費

北齊神武為東魏大將軍天平三年四月乙酉并肆汾
建晉東雍南汾秦陝九州霜旱人饑流散請所在開倉
賑給

廢帝乾明元年四月詔河南定冀趙瀛南膠光青九州
往因蟲水頗傷時稼遣分途贍卹

武成帝河清二年四月并汾景東雍南汾五州蟲旱傷
稼遣使賑卹

梁太祖開平四年十二月己巳詔曰滑宋輝亳等州水
澇敗傷人戶愁嘆朕為民父母良用痛心其令本州各
等級賑貸所在長吏監臨周給務令存濟壬辰賑貸東
都畿內如宋滑制

仁愛

傳曰上思利民忠也書曰民罔常懷懷于有仁是知仁之為德本乎惻隱恤患推恩濟衆誠在上者之所急也故有軫其札瘥之殃救其凶荒之沴天窮是念道殣斯掩弛悼耄之憲釋兵騶之役優蠲孕育疏廸幽閔皆愛人之深旨為邦之要道也至於禁燎原之暴罷竭澤之取閉屠肆以順時訓逸鷲禽以育生物斯又惠達於飛潛仁被於品物者矣蓋惻怛之愛好生之德聖人之所

先載籍之攸述可不務乎

宋文帝元嘉四年五月京師疾疫遣使存問給衣藥死者若無家屬賜以棺器

十年正月大赦詔孤老六疾不能存者人賜穀五斛

二十四年六月京邑疫癘丙戌使郡縣及營署部司普加履行給以醫藥

二十六年三月行幸丹徒詔遣使巡行百姓問所疾苦

孤老鰥寡六疾不能自存者人賜穀五斛

孝武大明四年詔曰都邑節氣未調疾癘猶衆言念民
瘼情有矜傷可遣使存問并給醫藥其死亡者隨宜賑

卹

後廢帝元徽二年五月討平桂陽王休範詔建康秣陵
二縣埋藏所殺賊屍

南齊太祖初為齊公平袁粲等屯新亭中興堂教曰河
南稱慈諒絲掩齒廣漢流仁實存殯朽近衰製茲營崇
溝浚漸古墟曩燧時有湮移深松茂草或至刊雉臨軒

動懷巡隍增愴宜竝為收葬并設薄祀

建元元年六月乙亥詔曰宋末頻年戎寇兼災疾彫損
或枯骸不收毀櫬莫掩宜速宣下埋藏營恤若標題猶
存姓字可識可即運載致還本鄉有司奏遣外監典事
四人周行離門外三十五里為限其餘班下州郡無棺
器標題者所屬以臺錢供市

武帝永明二年八月甲子詔曰空枯掩骼義重前誥卹
老哀瘡寔為令典朕永思民瘼弗忘鑒寐聲惠未敷物

多乖所京師二縣或有久墳毀廢可隨宜掩埋遺骸未
櫬竝加歛瘞病疾窮困不能自存者詳為條格竝加沾
賚

四年閏正月辛丑籍田詔孤老窮貧賜穀十石

五年正月辛卯賜孤寡老疾各有差

六年八月詔吳興水潦被水之鄉賑賜痼疾篤瘖口二
斛老口一斛小口五斛

十年正月詔賜孤老六疾人穀五斛

鬱林王即位詔曰近北掠餘口悉充軍實刑故無小罔
或攸赦撫孤興仁事深睿範宜從蕩宥許以自新一
同放遣還復民籍已賞賜者亦皆為贖

明帝建武二年正月辛未詔京師二縣有毀發墳壠隨
宜修理

東昏侯永元九年七月丁亥京師大水死者衆詔賜死
者棺器并賑卹

梁高祖初為大司馬承制下令以朱雀之捷逆徒送死

者特許家人殯葬若無親屬或有貧苦二縣長尉即為埋掩建康城內不違天命自取淪滅亦同此科

天監元年四月丙寅即位詔曰宋氏以來竝恣淫侈傾宮之富遂盈數千推算五都愁窮四海竝嬰罹冤橫拘逼不一撫絃命管良家不被蠲織室繡房幽厄猶見後弊國傷和莫斯為甚凡後宮樂府西廨暴室諸如此例一皆放遣若哀老不能自存官給廩食

十一年正月壬辰詔曰夫刑法悼耄罪不收孥禮著明

文史彰前事蓋所以申其哀矜故罰有弗及近代相因
厥網彌峻髫年華髮同坐八佞言雖懲惡勸善宜窮其制
而老幼流離良亦可愍自今逋誼之家及罪應質作若
年有老小可停將送

四月戊午詔曰去載胸山大殲醜類宜為京觀用旌武
功但伐罪弔民皇王盛軌掩骼埋胔仁者用心可下青
州悉使藏殯

十二年二月丙寅詔曰掩骼埋胔義重周經樛櫨有加

事美漢策朕向隅載懷每勤造次收藏之命亟下哀矜
而寓縣遐深遵奉未洽骯然路隅往往而有言愍沉枯
彌勞傷惻可明示遠近各巡境界若委骸不葬或蔭衣
莫改即就收斂量給棺具庶夜哭之魂斯慰雪霜之骨
有歸

十六年正月南郊詔民有產子依格優蠲孤老鰥寡不
能自存咸加賑恤

十七年八月詔以兵騶奴婢男年登六十六女年登六

十免為平民

普通二年正月南郊詔曰春司御氣虔恭報祀陶範克誠蒼壁禮備恩隨乾覆布茲亭育凡民有單孤老稚不能自存者郡縣咸加收養贍給衣食每令周足以終其身又於京師置孤獨園孤獨有歸華髮不匱若終年命厚加料理尤貧之家勿收租賦

四年正月詔應諸窮病咸加賑卹

大同七年十一月詔停在所役使女子丁

十年四月乙卯詔鰥寡孤獨尤貧者贍卹各有差

陳文帝天嘉元年正月大赦詔鰥寡孤獨不能自存者
賜穀人五斛

三年三月詔侯景以來遭亂移在建安晋安義安郡竝
許還本土其被畧為奴婢者釋為良民

宣帝大建五年四月癸亥詔北伐衆軍所殺齊兵竝令
埋掩

東魏孝靜天平二年三月以旱故詔京邑及諸州郡縣

收瘞骸骨

二年五月賜鰥寡孤獨貧窮衣物各有差

四年六月詔尚書掩骸埋瘞

北齊文宣帝天保七年五月以肉為斷慈遂不復食

八年四月詔諸取蝦蟇蜺蛤之類悉令停斷唯聽捕魚
又詔公私鷹鷄俱亦禁絕

九年三月巳丑詔限仲冬一月燎野不得他時行火損
昆虫草木

廢帝乾明元年詔諸良口配沒宮內及賜人者並免放
孝昭帝皇建元年八月乙酉詔宮奴婢年六十以上免
為庶人

武成帝清河元年正月詔並斷屠殺以順春令

後主天統四年十二月甲申詔掖廷晉陽中山宮人等
及鄴下并州大清真宮官口二處其年六十以上及有病
患者仰所司簡放

五年二月乙丑詔應宮刑者並免為官口又詔禁網捕

鷹鷄及畜養籠放之物

武平七年正月壬辰詔去秋已來水潦人饑不自立者所在付大寺及諸富戶濟其性命

梁太祖開平元年九月辛丑西京大內放出兩宮內人及前朝宮人任其所適

十一月壬寅帝以征討未罷調補為先遂命盡赦逃亡

背役髡黥之人各許歸鄉里

是髡黥也皆四方赤子二十年以來兵戈之地擒俘

蒸人為將中子弟遂黥之以記軍號真絕其逋逸逮于年月寢遠倦于征役或懷鄉土遂多奔叛所在闕防察

而執之皆謂之背軍復送本所無不誅者近年尤多此
色洎潛竄之後鄉里不容乃皆結黨羣集山藪之間以
求生因之為盜實州縣之大患今乃許歸鄉里無問從
來各得安便營生故愆赦之徒十去八九焉斯亦甚闕
政化也

二年七月癸巳勅禁屠宰兩月

八月辛亥勅應有暴露骸骨各委差人埋瘞

乾化二年五月丁亥詔曰生育之人爰當暑月乳哺之
愛方及薰風儻肆意於刳屠豈推恩於自養俾無殄暴
以助發生宜令兩京及諸州府夏季內禁斷屠宰及採

捕天民之窮諒由賦分國章所載亦務興仁所在鰥寡
孤獨廢疾不濟者委長吏量加賑卹史載葬枯用彰軫
惻禮稱掩骼將致和平應兵戈之地有暴露骸骨委所
在長吏差人專功收瘞國瘡之文尚標七祀良藥之郊
亦載三醫用憐無告之人宜徵有嘉之術凡有疫之處
委長吏檢尋醫方於要路曉示如有家無骨肉兼困窮
不濟者即仰長吏差醫給藥救療之

恤征役

周公東山之詩所以閔征役之勞也故曰說以使民民
忘其勞其是之謂矣始於孫氏逮於朱梁屬正閏之迭
興寶金革之靡息人嗟于役之苦戶掩其空之詠繇是
下寬大之詔敦休息之義惠澤洽於存沒仁風動於邇
遐斯所以得為國之體叶養民之道也

吳大帝黃武五年春令曰軍興日久民離農畔父子夫
婦不能相卹孤甚愍之今北虜縮竄方外無事其下州
郡有以寬息

景帝永安元年詔曰諸吏家有五人三人兼重為役父兄在都子弟給郡縣吏既出限米軍出又從至於家事無經護者朕甚愍之有五人三人為役聽其父兄所欲留為留一人除其米限軍出不從

宋高祖初為晉太尉凡南北征伐戰亡者竝列上賻贈尸喪未及遣主帥迎接到還本土

永初元年七月詔從征關雒隕身戰場幽沒不反者贍賜其家

文帝元嘉四年二月行幸丹徒詔登城三戰及大將家
隨宜周卹

二十六年三月幸丹徒詔登城三戰及大將戰亡墮沒
之家老病單弱者竝加贍卹

孝武帝以元嘉三十年五月即位八月詔武皇帝舊從
軍身嘗在齋內人身猶存者竝賜解戶又以新亭戰亡
者復同京城

大明三年八月詔曰近北討文武於軍亡沒或殞身矢

石或厲疾死立竝盡勤王事而飲糲卑薄可竝更賻給
務令豐厚

明帝太始三年二月為戰亡將士舉哀

後廢帝即位初詔緣戍兵老疾者悉聽還

元徽二年五月討平桂陽王休範詔建康秣陵二縣收
諸軍死者

南齊太祖建元四年詔曰比歲申威西北義勇爭先殞
氣寇場命盡王事戰亡蠲復雖有常典王者遵用每傷

簡簿建元以來戰亡賞蠲租市二十年雜役十年其不得收屍王軍保押亦同此例

武帝時王奐為鎮北將軍雍州刺史帝以行北諸戍士卒多襤縷送袴褶三千具令奐分賦之

明帝建武元年十一月詔細作中署材官軍府凡諸工可借開番假遞令休息

三年詔去歲索虜寇邊緣邊諸州郡將士有臨陣及疾病死亡者並送還本土

東昏侯即位初詔雍州將士與虜戰死者復除其差

永元元年太尉陳顯達救幽州敗績於馬圈詔為戰亡
將舉哀

梁高祖初為大司馬承制下令以義師臨陣致命及病
疾死亡者竝加葬歛收卹遺孤

陳文帝天嘉四年詔贈討周迪將士死王事者

五年十二月曲赦建安晉安二郡討陳寶應將士死王
事者竝給棺槨送還本鄉竝復其家瘡痍未瘳者給其

醫藥

少帝光太二年正月庚子詔討華皎軍人死王事者並給棺槨送還本鄉仍復其家

宣帝太建二年二月丙午詔曰自討周迪華皎以來兵交之所有死亾者並令收斂并給棺槨送還本鄉瘡痍未瘳者各給醫藥

七年六月丙戌為北討將士死王事者尅日舉哀

十年四月庚戌詔曰懋賞之言明於訓誥挾纊之美著

在撫巡近歲薄伐廓清淮泗摧鋒致果文武畢力櫛風
沐雨寒暑亟離念功在茲無忘終食宜班榮貴用饑厥
力絳在軍者可竝賜爵三級竝加賚卹付選即便量處
北齊文宣帝天保二年九月壬申詔免諸伎作屯收雜
色役隸之徒為白戶

孝昭帝即位詔軍人戰亡死王事者以時申聞當加榮
贈

梁太祖開平元年十二月辛亥詔曰潞寇未平王師在

野攻戰之勢難緩於寇圍飛輓之勤實勞於人力永言
輟耒深用軫懷宜令長吏丁寧布告期以兵罷之日
給復賦租於是戶人聞之皆忘其倦

二年三月幸澤州下詔以去年六月後昭義行營陣歿
都將吏卒死於王事追念忠赤乃錄其名氏各下本軍
令給養妻孥三年內官給糧賜

三年七月乙丑勅行宮將士陣歿者咸令所在給槨積
津置歸鄉里戰卒聞之悉感涕

八月辛亥制諸郡如有陣歿將士仰逐都安存家屬如
有弟兄兒姪便給與衣糧充役

冊府元龜卷一百九十五

欽定四庫全書

冊府元龜卷一百九十六 宋 王欽若等 撰

閏位部

建都

封建

勤政

誠勵

建都

先王之制封畿建都邑必即土中而為民極自秦據勢
勝宅於咸雍固河踐華遂吞六國蜀專西海之利而啟
國成都吳占石頭之固而定居建業宋齊四代丕承晉

緒南面君民載祀三百東魏遷鄴高齊是繼朱梁革命
浚郊攸宅皆辨方正位經營卜策作都制畿保姓傳祚
至若孫氏之始肇基於武昌梁德之季改卜於荆渚亦
著於篇云

秦始皇帝初為秦王都咸陽

今京兆府是秦自孝公作為咸陽築冀闕事具列國

君部建
國門

二十六年徙天下豪富於咸陽十二萬戶諸廟及章臺
上林皆在渭南秦每破諸侯寫放宮室作之咸陽北阪

上在長安西北漢武時別名渭城南臨渭自雍門在高陵縣以東至涇渭殿

屋複道周閣相屬所得諸侯美人鍾鼓以充入之

二十七年作信宮渭南已更命信宮為極廟象天極自

極廟道通鄜山作甘泉前殿築甬道築垣牆如街巷自咸陽屬

之是歲賜爵一級治馳道馳道天子道也若今之中道然漢書賈山傳曰秦為馳道

於天下東窮燕齊南極吳楚江湖之上濱海之觀畢至道廣五十步三丈而樹厚築其外隱以金椎樹以青松

三十五年除道道九原地理志五原郡有九原縣抵雲陽徐廣曰表云道九原

通甘泉塹山堙谷直通之始皇以為咸陽人多先王之宮

庭小吾聞周文王都豐武王都鎬豐鎬之間帝王之都也乃營作朝宮渭南上林苑中先作前殿阿房東西五百步南北五十丈上可以坐萬人下可以建五丈旗周馳為閣道自殿下直抵南山表南山之顛以為闕為複道自阿房渡渭屬之咸陽以象天極閣道絕漢抵營室也阿房宮未成欲更擇令名名之作宮阿房故天下謂之阿房宮隱宮徒刑者七十餘萬人乃分作阿房宮或作鄜山發北山石椁乃寫蜀荆地材皆至關中計宮三百

關外四百餘於是立石東海上胸界中以為秦東門因徙三萬家鄜邑五萬家雲陽皆復不事十歲

二世元年十二月就阿房宮

蜀先主以漢獻帝建安十九年降劉璋於成都自領益州牧二十六年即皇帝位都成都先是諸葛亮謂先主曰荊州北據漢沔利盡南海東連吳會西通巴蜀此用武之國益州險塞沃野千里天府之上高祖因之以成帝業將軍既帝室之胄若跨有荆益保其富阻西和諸

戎南撫夷越結好孫權內修政理天下有變則命一上將將荊州之軍以向宛雒將軍身率益州之衆出於秦川百姓孰敢不簞食壺漿以迎將軍者乎先主從之

吳大帝以後漢獻帝建安六年為會稽太守屯吳使承之郡十六年徙治秣陵初張紘謂帝曰秣陵楚武王所置名為金陵地勢岡阜連石頭訪問故老云昔秦始皇東巡會稽經此縣望氣者云金陵地形有王者都邑之氣故掘斷連岡改名秣陵今處所具存地有其氣天

之所命宜為都邑帝善其議未能從也蜀先主之東宿
於秣陵周觀地形亦勸都之帝曰智者意同遂都焉於
十七年城石頭改秣陵為建業

魏文帝黃初二年大帝自公安都鄂改名武昌以武昌下雒
尋陽陽新柴桑沙羨六縣為武昌郡八月城武昌

黃武二年正月城江夏山

黃龍元年九月遷都建業因故府不改館

赤烏八年遣校尉陳勳將屯田及作士三萬人鑿句容

中道自小其至雲陽西城通會市作邸閣

十年三月改作太初宮諸將及州郡皆義作

後主甘露元年九月從西陵督步闡表徙都武昌御史大夫丁固右將軍諸葛靚鎮建業

寶鼎元年十二月還都建業衛將軍滕收留鎮武昌二年六月起顯明宮十二月移居之

宋高祖受晉禪都建業

文帝元嘉二十年正月於臺城東西作萬春千秋二門

二十五年四月乙巳新作閭闔廣莫二門改先廣莫門曰承明開陽門曰津陽

孝武帝孝建元年正月起正光殿

大明三年以揚州所統六郡為王畿以東揚州為揚州四年四月以南琅邪隸王畿

五年初立馳道自閭闔至於朱雀門又自承明門至於玄武湖

六年新作大航門

前廢帝景和元年以石頭城為長樂宮東府城為未央宮罷東揚州并揚州以北邸為建章宮南第為長楊宮又以王畿諸郡為揚州以揚州為東揚州

南齊太祖受宋禪都於建業建元二年五月立六門都

墻

宋世外六門設竹籬帝即位有發白虎樽者言白門墻三重開竹籬穿不完帝感其言故立都墻王儉諫之

帝曰吾欲令後世無以加也

梁高祖受齊禪都建業

天監六年九月改閱武堂為德陽堂聽訟堂為儀賢堂

七年正月作神龍仁虎闕於端門大司馬門外

二月新作國門於越城南

九年正月新作緣淮塘北岸起石頭迄東治南岸起後渚籬門迄三橋

十年作宮城門三重樓及開二道

十二年二月辛巳新作太極殿改為十三間三月庚子太極殿成

元帝為荊州刺史太清三年侯景陷建業承聖元年十

一月即位於荊州

二年八月詔曰夫爰始居亳不廢先王之都受命於周
無改舊邦之頌頃戎旃既息闕析無警去魯興歎有感
宵分過沛殞涕實勞夢寐仍以瀟湘作梗庸蜀阻兵命
將授律指期尅定今八表又清四郊無壘宜從青蓋之
典言歸白水之鄉江湘委輸方船連舳巴峽舟艦精甲
百萬先次建業行實京師然後六軍邁征九旂揚旆拜
謁營陵修復宗社主者詳依舊典以時宣勒初帝以建

業凋殘方須修葺江陵殷盛便欲安之又其故府臣僚
皆楚人也並願即都荊郢嘗召羣臣議之領軍將軍胡
僧祐吏部尚書宗慄太府卿黃羅漢御史中丞劉穀等
曰建業雖是舊都王氣已盡且與北寇隣接止隔一江
若有不虞悔無及矣臣等又嘗聞之荆南之地有天子
氣今陛下龍飛纂業其應斯乎天時人事徵祥如此臣
等所見遷徙非宜元帝深以為然時左僕射王褒尚書
周弘正咸侍坐乃顧謂褒等曰卿意以為何如褒性謹

慎知元帝多猜忌弗敢公言其非當時唯唯而已後因清間密諫言辭甚切元帝頗納之然其意好荆楚已從僧祐等策明日乃於衆中謂褒曰卿昨日勸還建業不為無理褒以宣室之言豈宜顯之於衆知其計之不用也於是不復言

敬帝太平元年十一月起雲龍神虎門

後梁宣帝初為南雍州刺史稱藩於後魏時周太祖為丞相命帝為梁王帝乃於襄陽置百官承制封拜太祖

令柱國于謹伐江陵帝以兵會之及江陵平太祖立帝
為梁王居江陵東城資以江陵一州之地其襄陽所統
盡歸於魏帝乃稱皇帝於其國其慶賞刑政官方制度
並同王者唯上䟽則稱臣奉西魏正朔

陳高祖受梁禪都建業

永定二年七月起太極殿初侯景之平也火焚太極殿
承聖中議欲營之獨闕一柱至是有樟木大十八圍長
四丈五尺流泊陶家後渚監軍鄒子度以聞詔中書令

沈衆兼起部尚書少府卿蔡儔兼將作大匠起太極殿
文帝天嘉五年九月城西城

六年九月新作大航

宣帝太建四年十二月丁卯詔曰梁氏之季兵火薦臻
承華焚蕩頓無遺構寶命惟新將迄二紀頻事戎旅未
遑修繕今工役差閒椽楹有擬來歲開肇創築東宮可
權置起部尚書將作大匠用主監作

七年六月己酉改作雲龍神虎門

九年十二月戊申東宮成皇太子移於新宮

後主末年起齊雲宮國人歌曰齊雲宮觀來無際畔

東魏孝靜帝天平元年十月即位於雒城之東是月車
駕北遷於鄴詔齊獻武王高歡留後部分改司州為雒
州以尚書令元弼為儀同三司雒州刺史鎮雒陽十一
月車駕至鄴居北城相州之解改相州刺史為司州牧
魏郡太守為魏尹徙鄴舊徑百里以居新遷人分鄴置
臨漳縣以魏郡林慮廣平陽丘汲郡黎陽東濮陽清河

廣宗等郡為皇畿起部郎中辛術奏曰今皇居徙御百度創始營構一興必宜中制上則憲章前代下則模寫雖京今鄴都雖舊基址毀滅又圖記參差事宜審定臣雖膺職司學不稽古國家大事非敢專之通直散騎常侍李業興碩學通儒博聞多識萬門千戶所宜訪詢今求就之披圖按記考定是非參古雜今折中為制召畫工并所須調度具造新圖申奏取定庶經始之日執事無疑詔從之

二年八月發衆七萬六千人營新宮

興和元年九月發畿內十萬人城鄴四十日方罷

北齊文宣帝受東魏禪都鄴

天保二年改顯陽殿為昭陽殿起宣光建始嘉福仁壽
諸殿又修廣三臺宮殿

七年詔造金華殿時高隆之為尚書右僕射領營構大
將軍京邑制造莫不繇之增築南城周迴二十五里以
漳水近於帝城起長堤以防汎溢之患又鑿渠引漳水

周流城郭造水治碾磴並有利於時

九年八月發丁匠三十餘萬營三臺於鄴下因其舊基而高博之大起宮室及游豫園至是三臺成改銅爵曰金鳳金虎曰聖應水井曰崇光

後主天統三年十二月起晉陽大明殿

武平二年七月詔營邯鄲宮

梁太祖開平元年四月受唐禪都汴詔曰古者興王之
地受命之邦集大勳有異庶方霑慶澤所宜加等故豐

沛著起祚之美襄鄧有建都之榮用壯洪基且旌故里
爰遵令典先示殊恩宜升汴州為開封府建名東都其
東都改為西都仍廢京兆府為雍州刺史佐國軍節度
使是月制宮殿門及都門名額正殿為崇元殿東殿為
玄德殿內殿為金祥殿萬歲堂為萬歲殿門如殿名大
內正門為元化門皇城南門為建國門滴漏門為啟運
門下馬門為升龍門玄德殿前門為崇明門正殿東門
為金烏門西門為玉兔門正衙東門為崇禮門東偏門

為銀臺門宴堂門為德陽門天王門為賓天門皇牆東門為寬仁門浚儀門為厚載門皇牆西門為神虎門望京門為金鳳門宋門為觀化門尉氏門為高明門鄭門為開明門梁門為乾象門酸棗門為興和門封丘門為含曜門曹門為建陽門昇開封浚儀為赤縣尉氏封丘雍丘陳留為畿縣

五月改文思院為乾文院同和院改為佐鸞院以西都水北宅為大昌宮

六月以西都徽安門北路逼近大內宮垣兼非民便令
移自榆林直趣端門之南

二年七月甲午以高明門外繁臺為講武臺是臺西漢
梁孝王之時嘗按歌閱樂於此當時因名曰吹臺其後
有繁氏居於其側里人乃以姓呼之時代綿寢雖官吏
亦從俗焉帝每登眺蒐乘訓戎宰臣以是事奏而名之
三年正月改西京貞觀殿為文明殿含元殿為朝元殿
二月改思政殿為金鑿殿勅東都曰自昇州作府建邑

為都未廣邦畿頗虧國體其以滑州酸棗縣長垣縣鄭
州中牟縣陽武縣宋州襄邑縣曹州戴邑縣許州扶溝
鄆陵縣陳州太康縣等九縣宜並割屬開封府仍昇為
畿縣

七月改章善門為左右銀臺門其左右銀臺門却改為
左右興善門

十一月勅改乾文院為文思院行從殿為興宅殿球場
為安球場又改弓箭庫殿為宣武殿

封建

草昧建侯義易之教顯武成分土周書之制存皆所以
懋德疇庸藩屏王室自運衰典午祚啟餘分何嘗不錫
壤開封報功懷遠梁承唐弊方夏不賓恩極於誓河寵
踰於賜履務豐姑息之意非復選建之規名器假人於
斯為甚五等之爵蓋其常制繇是略而勿論一字之封
茲為殊典聊用存而垂誠

宋順帝昇明二年立故武昌太守劉琨息頌為南豐縣

王

梁高祖普通六年正月魏徐州刺史元法僧以彭城來降授司空封始安郡王二月改封宋王時魏宗正卿元樹以爾朱榮亂歸國封為鄴王

太清元年魏大將軍侯景降請元氏戚屬願奉為王詔封元貞為咸陽王以天子禮遣還北景敗而反

東魏孝靜帝武定七年正月梁北徐州刺史蕭正表以鎮內附封蘭陵郡公吳郡王

北齊文宣帝天保元年即位詔封功臣高隆之為平原
王庫狄干為章武王斛律金為咸陽王賀拔仁為安定
王韓軌為安德王爾朱渾道元為扶風王彭樂為陳留
王司空公潘相樂為東平王

五年八月武衛將軍長樂郡公段韶降梁將東方白額
執而斬之并其諸弟等傳首京師江淮帖然民皆安輯
帝嘉其功詔賞吳口七十人封平原郡王
七年正月封司空侯莫陳相為白水郡王

十年正月太尉長樂郡公尉粲肆州刺史濮陽公婁仲
遠並進爵為王

孝昭帝皇建元年封瀛州刺史婁獻為安東王

武成帝封婁定遠為臨淮郡王

後主天統五年四月封開府城陽郡公慕容儼為義安
王

武平二年九月左丞相平原王段韶病篤詔封其子深
濟北王以慰其意

梁太祖開平元年四月即位制武安軍節度使馬殷進封楚王

五月進封河南尹兼河陽節度使張全義為魏王兩浙節度使錢鏐進封吳越王

二年五月封義昌軍節度使劉守文加中書令封大彭王盧龍軍節度使劉守光封河間郡王許州節度使馮行襲封長樂王

三年三月進封朔方節度使潁川郡公韓遜為潁川郡

王

四月制易定節度使王處直進封北平王福建節度使
王審知封閩王廣州節度使劉隱封南平王同州節度
使劉知俊封大彭郡王山南東道節度使楊師厚封弘
農郡王

七月進封幽州節度使河間郡王劉守光為燕王

乾化元年五月制封延州節度使高萬興為渤海郡王
七年封保義節度使王壇為琅邪郡王

末帝以乾化三年二月即位尋以太子太師致仕葛從周為潞州節度使封陳留郡王

三月制進封天雄軍節度使弘農郡王楊師厚為鄴王夏州節度使李仁福封隴西郡王

貞明元年二月進封延州節度使渤海郡王高萬興為渤海王六年四月進封延安王

勤政

夫君人者惟政是務為政者惟勤是治故傳曰文王猶

勤況寡德乎若乃據有疆宇抗行正統苟或逸豫靡戒
憂勞是忘既法制之固修豈民心而可固則有鷄鳴廢
寢日昃視朝量書有程投籤自警雖簿領之細躬加受
奏獄訟之繁親為臨決勞精靡倦總攬不遺故得下情
上通庶事無壅保安之道諒在茲乎垂諸信史煥然可
則

秦始皇在位天下之事無大小皆決於帝至以衡石量

書

石一百二十斤

日夜有程不中程不得休息

吳大帝親斷諸縣倉庫及囚繫長丞皆見呂岱守吳丞
處法應問甚稱帝意召署錄事

宋高祖永初元年十二月朔車駕臨延賢堂聽訟

二年四月又於華林園聽訟

五月己酉甲戌又幸華林園聽訟

六月壬寅又於華林園聽訟

八月壬辰又於華林園聽訟

十月癸卯於延賢堂聽訟

文帝元嘉三年五月丙午臨延賢堂聽訟

六月丙寅又於延賢堂聽訟丙子又聽訟

五年十月甲辰於延賢堂聽訟

八年三月甲申於延賢堂聽訟

孝武以元嘉三十年四月即位冬十月癸未車駕於閱

武堂聽訟

孝建三年二月始制朔望臨西堂接羣下受奏事

六月於華林園聽訟

大明元年五月癸酉於華林園聽訟自是非巡狩軍役則車駕歲三臨訊

八月壬寅於華林園聽訟

十月丙申詔曰旒纒之道有孚於結繩日昃之勤已切於姬后况世弊教淺歲月澆季朕雖戮力寓內未明求衣而識狹前王務廣昔代永言菲德其愧良深朝咨野怨自達者寡惠民利公所昧實衆自今百辟庶尹下民賤隸有懷誠抱志擁鬱衡閭失理負謗未聞朝聽者皆

聽躬自申奏小大以聞朕因聽政之日親對覽焉

十二月戊戌於華林園聽訟

二年三月丁卯於華林園聽訟

九月癸卯於華林園聽訟

閏十二月庚申於華林園聽訟

三年四月癸卯於華林園聽訟

九月乙巳詔曰自今囚至辭具並即以聞朕當悉詳斷

庶無留獄

十二月戊午於華林園聽訟

四年五月庚辰於華林園聽訟

九月甲申於華林園聽訟

十二月乙未於華林園聽訟

五年五月丙辰幸閱武堂聽訟

七年二月幸南豫州帝於行所訊漂陽永世丹陽縣囚

八月幸建康秣陵縣詳獄囚

九月車駕幸廷尉訊獄囚

十月行幸江寧縣訊獄囚

十一月車駕習水軍於梁山原放行獄徒繫

明帝泰始五年三月丙寅幸中堂聽訟

六年十月己酉幸東堂聽訟

後廢帝元徽三年四月丙戌車駕幸中堂聽訟

南齊太祖建元二年十二月乙巳車駕幸中堂聽訟

武帝永明二年六月癸卯車駕幸中堂聽訟

三年七月詔丹陽所領及餘二百里內見囚同集京師

自此以外委州郡決斷

八月乙未車駕幸中堂聽訟

明帝建武二年四月己亥詔三百里內獄訟同集京師
尅日聽覽

梁高祖微時知民疾苦逮踐皇極躬覽庶事日昃聽政
求民之瘼乃命輜軒以省方俗置肺石以達窮民務加
隱恤舒其急病每至冬月四更竟即張燭看事執筆觸
寒手為皴裂糾姦摘伏洞盡物情常有懷哀矜泣涕然

後可奏日止一食膳無鮮腴唯豆羹麤糲

陳高祖以永定元年十月即位其月戊寅輿駕幸華林園親覽詞訟臨赦囚徒

二年三月乙卯帝幸後堂聽訟

三年六月癸卯帝疾小瘳臨訊獄訟

陳文帝天嘉元年八月癸未臨景陽殿聽訟帝每有主者奏決妙識真偽一夜內刺閨取外事分判者前後相續每鷄人伺漏傳更籤於殿中及刺送者必投籤於階

石上令鎗然有聲云吾雖眠亦令人驚覺也

東魏孝靜帝天平四年六月己巳幸華林園理訟

元象元年六月壬辰帝幸華林園聽訟

武定元年三月帝親聽訟

北齊文宣帝天保六年三月戊戌臨昭陽殿聽獄決訟
七年二月辛未詔常山王演等於涼風殿讀尚書奏按
論定得失帝親決之

廢帝乾明元年正月甲辰幸華林園親錄囚徒死罪以

下降免各有差

誠勵

伊訓曰儆于有位洪範云是彝是訓自昔哲王曷嘗不誠勵厥俗俾克繇禮敷言庶列罔或曠官藹然今猷布於簡冊自漢鼎既輕幅員分裂英雄崛起各據勢勝庇民主祀率先風教若夫繼體承業貞邦作翰葛藟固本閨門篤愛是必勗以道義責成寄任室其嗜好禁其驕縱至有肅奉軍志力扶義舉專宰牧之任叅刑法之重

分職聯事交修庶務莫不順考古訓申明誠誥以至臨
遣諭旨督誨切至蓋御下之明略垂世之隆範也

蜀先主遺詔後主曰勿以惡小而為之勿以善小而不
為惟德能服於人汝父德薄勿效之可讀漢書禮記閒
暇歷觀諸子及六韜商君書益人意智聞丞相為寫申
韓管子六韜一通已畢未送道亡可自更求聞達

後主時來敏為輔軍將軍坐事去職後為大長秋又免
後累遷光祿大夫復坐過黜前後數貶削皆以語言不

節舉動違常也後以敏為執慎將軍欲令以官重事自
警戒也

吳大帝謂呂蒙及蔣欽曰卿今當塗掌事宜學問以自
開益蒙曰在軍中嘗苦多務恐不容復讀書帝曰孤豈
欲卿治經為博士邪但當令涉獵見往事耳卿言多務
孰若孤孤少時歷詩書禮記左傳國語惟不讀易至統
事以來省三史諸家兵書自以為大有所益如卿二人
意性朗悟學必得之寧當不為乎宜急讀孫子六韜左

傳國語及三史孔子言終日不食終夜不寢以思無益
不如學也光武當兵戈之務手不釋卷孟德亦自謂老
而好學卿何獨不自勉勗邪蒙始就學篤志不倦經其
所覽舊儒不勝後魯肅上代周瑜過蒙言議常欲受屈
肅拊蒙背曰吾謂大弟但有武略耳至於今者學識英
博非復吳下阿蒙蒙曰士別三日即便刮目相待大兄
今論何一稱穰侯乎兄今代公瑾既難為繼且與闕侯
為隣斯人長而好學讀左傳略皆上口梗亮有雄氣然

性頗自負好陵人今與為對當有單複以卿待之密為
肅陳三策肅故受之秘而不宣帝常歎曰人長而進益
如呂蒙蔣欽蓋不可及也富貴榮顯更能折節好學耽
悅書傳輕財尚義所行可述並作國士不亦休乎帝常
下令諸將曰夫存不忘亡安必慮危古之善教昔雋不
疑漢之名臣於安平之世而刀劍不離於身蓋君子之
於武備不可以已况今處身疆畔豺狼交接而可輕脫
不思變難哉頃聞諸將出入各尚謙約不從兵甚非備

慮愛身之謂夫保身遺名以安君親孰與危辱宜深警
戒務崇其大副孤意焉

建昌侯慮有才名時丞相顧雍等請開府假節大帝乃
詔曰期運擾亂凶邪肆虐威罰有序干戈不戢以慮氣
志休懿武略夙昭必能為國佐定大業故授以上將之
位顯以殊特之榮寵以兵馬之勢委以偏方之任外欲
威振敵虜厭難萬里內欲鎮撫遠近慰恤將士誠慮建
功立事竭命之秋也慮其內修文德外經武訓持盈若

冲則滿而不溢敬慎乃心無忝所受

宋高祖微時有納布衫襖等衣皆是敬皇后手自作高祖既貴以此衣付長女會稽公主曰後世若有驕奢不節者可以此衣示之永初末高祖疾甚召太子戒之又為手詔曰朝廷不須復有別府宰相帶揚州可置甲士千人若大臣中任要宜有爪牙以備不祥人者可以臺見隊給之有征討悉配以臺見軍隊行還復舊後世若有幼主朝事一委宰相母后不須臨朝仗既不入臺殿

門要重人可許給班劔

文帝時劉道濟為振武將軍益州刺史長史費謙別駕張熙叅軍楊德年等並聚斂興利而道濟委任之傷政害民民皆怨毒帝聞之與道濟詔戒之曰聞卿在任未盡清省又頗殖貨若萬一有比必宜改之比傳人情不甚緝詣當以法御下深思自警以副本望衡山王義季為荊州刺史素嗜酒自彭城王義康廢後為長夜之飲略少醒日文帝累加詰責義季引愆陳謝帝詔報之曰

誰能無過改之為貴耳此非唯傷事業亦自損性命世
中比比皆汝所諳近長沙兄弟皆緣此致物故將軍蘇
徽耽酒成疾旦夕待盡吾誠斷並給藥膳至今能立
自是可節之物但嗜者不能立志裁割耳晉元帝人主
尚能感王導之諫終身不復飲酒汝既有美尚加以吾
意殷勤何至不能慨然深自勉勵乃復嚴相割截坐諸
紛紜然後少止者幸可不至此一門無此酣酒汝於何
得之臨書歎塞義季雖奉此旨酣縱如初遂以成疾帝

又詔之曰汝飲積食少而素羸多風常慮至此今果委頓縱不能以家國為懷近不復顧性命之重可歎可恨豈復一條本望能以禮自厲未欲相苦耳今遣孫道胤就楊佛等令辰夕視汝并進止湯食可開懷虛受慎勿隱避吾飽嘗見人斷酒無他慊吸蓋是當時甘嗜固已之意耳今者憂怛正在性命未暇及美業復何為令吾煎毒至此耶義季終不改以至於終

江夏王義恭雖涉獵文義而驕奢不節既出鎮江陵文

帝戒之曰汝弱冠便親方任天下艱難國家事重雖曰
守成寶亦未易隆替安危在吾曹耳豈可不感尋王業
大懼負荷今既分張言集無日無繇復得動相規誨宜
深自砥礪思而後行開布誠心厝懷平當親禮國士交
接佳流識別賢愚鑒察邪正然後能盡君子之心收小
人之力汝神意爽悟有日新之美而進德修業未有可
稱吾所以恨之而不能已已者也汝性褊急袁太妃亦
說如此性之所滯其欲必行意所不存從物回改此最

弊事宜應慨然立志念自我抑何至丈夫方欲贊世成名而無斷者哉今粗疏十數事汝別時可省之遠大者豈可具言細碎復非筆可盡禮賢下士聖人垂訓驕侈矜尚先哲所去豁達大度漢祖之德猜忌褊急魏武之累漢書稱衛青將軍遇士大夫以禮與小人有恩西門安于矯性齊美關張二將任偏同弊行已舉事深宜鑒此若事異今日嗣子幼蒙司徒便當周公之事

臣欽若曰司徒

即義恭兄弟彭城王義康也

汝不可不盡祇順之理苟有所懷密自

陳若形迹之間深宜慎護至於爾時安危天下決汝二人耳勿忘吾言今既進袁太妃供給計足充諸用此外一不須復有求取近亦具此意唯脫應大餉致而當時遇有所乏汝自可少多供奉耳汝一月日自用不可過三十萬若能省此益美西楚殷曠常宜早起接對賓侶勿使留滯判急務訖然後可入問訊既覩顏色審起居便應即出不須久停以廢庶事也下日及夜自有餘閒府舍住止園池臺觀略所諳究計當無須改作司徒亦

云爾若脫於左右之宜湏小小回易當以始至一治為
限不湏紛紜日求新異凡訊獄多決當時難可逆慮此
實為難汝復不習殊當有次第訊前一二日取訊簿密
與劉湛輩共詳大不同也至訊日虛懷博盡慎無以喜
怒加人能擇善者而從之美自歸已不可專意自決以
矜獨斷之明也萬一如此必有大郤非唯訊獄君子用
心自不應爾刑獄不可壅滯一月可再訊凡事皆應慎
密亦宜豫勅左右人有至誠所陳不可漏泄以負忠信

之款也古人言君不密則失臣臣不密則失身或相讒
搆勿輕信受每有此事當善察之名器深宜慎惜不可
妄以假人昵近爵賜尤應裁量吾於左右雖為少恩如
聞外論不以為非也以貴凌物物不服以威加人人不
厭此易達事耳聲樂嬉游不宜令過蒲酒漁獵一切勿
為供用奉身比皆有節度奇服異器不宜興長汝嬪侍左
右已有數人既始至西未可忽忽復有所納又戒之曰
宜數引見佐史非唯臣主自應相見不數則彼我不親

不親則無因得盡人人不盡復何繇知其衆事廣引視聽既益開博於言事者又差有地也乃以劉湛為撫軍長史行府州事義恭性甚狷隘年又漸長欲專政事每為湛所裁主佐之間嫌隙遂構文帝聞之密遣使詰讓義恭并使深加諧緝義恭具陳湛無居下之禮又自以年長未得行意雖奉詔旨頗有怨言上友于素篤欲加酬順乃詔之曰事至於此甚為可歎當今之才委授已爾宜盡相彌縫取其可取棄其可棄汝疏云泯然無際

如此甚佳彼猜不可令萬一覺也汝年已長漸更事物且羣情矚望不以幼昧相期何繇故如十歲時動止諮問但當今所專必是小事耳亦恐量此輕重未必是得彼之疑怨兼或繇此耶

南郡王義宣當為荊州文帝以其人才素短不堪居上流而會稽公主母以為言帝遲回久之元嘉二十一年乃以義宣都督荆雍益梁寧南北秦等州諸軍事車騎將軍荊州刺史持節常侍如故先賜中詔曰師護以在西

久比表求還出內左右自是經國常理亦何必其應於
一往今欲聽許以汝代之師護雖無殊績潔已節用通
懷期物不恣羣下此信未易非唯聲著西土朝野以為
美談在彼已有次第為士庶所安論者乃謂未議遣之
今之回換更在欲為汝耳汝與師護年時一輩各有其
美萬物之議亦互有少劣若今向事脫一減之者既於
西夏交有巨礙遷代之譏必歸責於吾矣復當為師護
怨非但一誚而已也如此則公私俱損為不可不先共

善詳此事亦易勉耳無為使人動生評論也師護義季小字也義宣至鎮勤自課厲政事修理

孝武帝時太子子業幼而狷急在東宮每為帝所責帝乃巡子業啟叅承起居書迹不謹帝詰讓之子業啟事陳謝帝又荅曰書不長進此是一條耳聞汝素都懈怠狷戾日甚何以頑固乃爾邪

張永為廷尉孝武謂之曰卿既與釋之同姓欲使天下須無寃民

明帝時永嘉王子仁為湘州刺史帝遣主書趙扶公宣
旨於子仁曰汝一家門戶不建幾覆社稷天未亡宋景
命集我上流迷愚相扇四海同惡若非我修德御天下
三祖基業一朝墜地汝輩便應淪於異族之手我昔兄
弟近二十人零落相繼存者無幾唯司徒年長令德作
輔皇家臣欽若等曰司徒即明
帝弟始安王休仁也門戶所憑唯我與司徒
二人而已尚未能厭百姓姦心餘諸王亦未堪贊治我
唯有太子一人司徒世子年又幼弱桂陽巴陵並未有

繼體正賴汝輩兄弟相倚為強庶使天下不敢闕覘王
室汝輩始十餘歲裁知俛仰當今諸舍細弱殆不免人
輕凌若非我為主劉氏不辦今日汝諸兄弟冲眇為羣
凶所逼我遂與百姓還圖骨肉於汝在心不能無愧即
日四海就寧恩化方始方今處汝湘洲汝年漸長足知
善惡當每思刻厲奉朝廷為心爵秩自然與年俱進我
垂猶子之情著於萬物汝亦當知好憶我勅旨

南齊太祖時淮北四州起義帝使輔國將軍周山圖自

淮入清倍道應赴勅山圖曰卿當盡相師馭理每存全
重天下事唯同心力山岳可摧然用兵當使背後無憂
慮若後冷然無橫來處閉目痛打無不摧碎吾正應鑄
金待卿成勲耳若不藉此平四州非丈夫也努力自運
勿令他人得上功會義衆已為魏所沒山圖拔三百家
還淮陰及武皇帝踐阼轉黃門郎領羽林四廂直衛山
圖於新林立墅舍晨夜往還帝謂之曰卿罷萬人都督
而輕行郊外自今往墅可以仗身自隨以備不虞

武帝時晉安王子懋為征北將軍雍州刺史帝勅以邊
略曰吾比連得諸處啟所說不異寇必無敢送死理然
為其備不可暫懈今秋北寇皆越逸者其亡滅之徵吾
今亦密行募集須有分明旨的便當處分今普勅鎮守
並部民丁有事即便應接運已勅更遣想行有至者汝
共諸人量覓可使數人往南陽舞陰諸要處叅覘糧食
最為根本更不要人仗常行視驛亭馬不可有廢闕并
約語彼諸州當其界皆爾不如法即問事又曰吾勅荆

郢二鎮各作五千人陣本擬應接彼耳賊若送死者即
便呼取之已勅子真魚繼宗殷公愍至鎮可以公愍為
城主三千人配之便足汝可好以階級在意勿得人求
或超三五階級文章詩筆乃是佳事然世務彌為根本
可常憶之汝所啟仗此悉是吾左右御仗也云何得用
之品格不可乖吾自當優量覓送

梁高祖時劉孝綽為太子舍人俄以本官兼尚書水部
郎奉啟陳謝手勅荅曰美錦未可便製簿領亦宜稍習

頃之即真

蕭子恪為司徒左長史與弟子範等嘗因事入謝高祖
在文德殿引見之從容謂曰我與卿兄弟有言天下之
寶本是公器非可力得苟無期運雖有項籍之力不能
如何所以班彪王命論云所求不過一金然終轉死溝壑卿
不應不讀此書宋孝武性猜忌兄弟粗有令名者無不因事
鳩毒所遺唯景和其餘朝臣之中或疑有天命而致害者枉
濫相繼然而或疑有天命而不能害者或不知有天命而

不疑者于時雖疑卿祖而不能如何是疑而不得又有
不疑者如宋明帝本為庸常被免豈疑而得全又復我
于時已年二歲彼豈知我應有今日當知有天命者非
人所害害亦不能得我初平建康城朝廷內外皆勸我
云時代革異物心湏一宜行處分我于時依此而行誰
謂不可我正言江左以來代謝必相誅戮此是傷於和
氣所以國祚例不靈長所謂殷鑒不遠在夏后之世此
是一義二者齊梁雖曰革代義異往時我與卿之兄弟

雖復絕服二世宗屬未遠卿勿言兄弟是親人家兄弟自有周旋者有不周旋者况五服之屬邪我與卿兄弟便是情同一家豈當都不念此作行路事此是二義我有今日非是本意所求且建武屠滅卿門致卿兄弟塗炭我起義兵非唯自雪門耻亦是為卿兄弟報仇卿若能在建武永元之世撥亂反正我雖起樊鄧豈得不釋戈推奉其雖欲不已亦是師出無名我今為卿報仇且時代革異望卿兄弟盡節報我耳且藉喪亂代明帝家

天下耳不取卿家天下昔劉子輿自稱成帝子光武言
假使成帝更生天下亦不復何況子輿乎梁初人勸我
相誅滅者我荅之猶如向孝武時事彼若苟有天命非
我能殺若無期運何忽行此正足示無度量曹志親是
魏武帝孫陳思之子事晉武能為晉室忠臣此即卿事
例卿是宗室情義異他方坦然相期卿無復懷自外之
意小待自當知我寸心又文獻王時內齋直帳闔人趙
叔祖天監初入為臺齋帥在壽光省高祖呼叔祖曰我

本識汝在北第以汝舊人故每驅使汝比見北第諸郎不叔祖奉荅云比多在直出外甚踈假使暫出亦不能得往高祖曰若見北第諸郎道我此意我今日雖是革命情同一家但今盤石未立所以得用諸郎者非唯在我未宜亦是欲使諸郎得安耳但閉門高枕後自當見我心叔祖即出外具宣勅語子恪尋出為永嘉太守陳後主至德二年十月詔曰在事百官辨斷庶務必取平允無得挾公害民為已聲績妨紊政道

北齊文襄為東魏丞相時劉偉為睢州刺史文襄降書
褒獎云以卿家世忠純奕代冠冕賢弟賢子並與吾共
事懷抱相託亦自依然宜勗心力以副所委莫慮不富
貴

文宣帝時清河王岳子勵除青州刺史帝戒之曰叔父
前收青州甚有遺惠故遣汝慰彼黎庶宜好用心無墜
聲績勵流涕曰臣以蒙幼濫叨拔擢雖竭庸短懼忝先
政帝曰汝既能有此言吾不慮也

梁太祖乾化二年五月詔曰共理庶民是資牧宰克勤厥職必選端良倘徇私以減公則興災而歛怨豈遵條教實膏蠹猷其所在長吏不得因緣差役分外誅求律令所施典刑具在寧容殘忍合務哀矜宜令所在長吏不得淫刑酷法湏臻有道免致無辜

冊府元龜卷一百九十六

欽定四庫全書

子部

冊府元龜卷一百九十七至二百

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官學正臣李巖

謄錄監生臣李如梓

欽定四庫全書

冊府元龜卷一百九十七 宋 王欽若等 撰

閏位部

朝會
宴會
慶賜
納貢獻

朝會

朝會者禮之經也。嬴秦罷侯守不越境，歲時班制，又匪經見。吳蜀而下，時時間作事之細者，史或失傳。至於聲名文物，表著明數，存諸類例，此不復陳沿革在斯，粗可

網舉儷於大國誠則多慙君彼一隅斯亦為政云爾
吳景帝永安元年十二月戊辰臘百僚朝賀

宋文帝元嘉三年正月乙亥朔會羣臣於太極前殿

明帝泰始二年正月己丑朔以軍事不朝會

南齊武帝永明六年十月庚申立冬初臨太極殿讀時

令

梁太祖開平元年十月癸酉御史司憲薛廷珪奏請文
武百官仍舊朝叅先是帝欲親征北寇命朝臣先赴雒

都至是緩其期乃允所奏宰臣請每月初入閣望日延英聽政永為常式

二年正月癸酉帝御金祥殿受宰臣文武百官及諸藩屏陪臣稱賀諸道貢舉一百五十七人見于崇元門

三年正月戊辰朔帝御金祥殿受宰臣翰林學士稱賀文武百官拜表於東上閣門

八月甲午勅朕以干戈尚熾華夏未寧宜循卑菲之言用致雍熙之化起八月一日常朝不御金鑾崇勳兩殿

只於便殿聽政

四年正月壬辰朔帝御朝元殿受百官稱賀用禮樂也
十一月己亥日南至帝被袞冕御朝元殿列細仗奏樂
於庭群臣稱賀

五年二月丙辰朔帝御文明殿群臣入閣

乾化元年九月辛巳朔帝御文明殿群臣入閣刑法待
制官各奏事

十月乙未帝御朝元門以回鶻吐蕃二大國首領入覲

故也

宴會

先王制合宴之禮著序賓之訓所以申飲賜之嘉好勸羣臣之盡心詩之鹿鳴湛露所為作也自嬴秦劉蜀以迄江左魏齊傳禪逮于朱梁曷嘗不乘時展豫置酒高會或歷覽故邑或翱翔池榭班觴於講禮之隙宿設於考室之際因嘉慶以合飲議勲賞而舍爵征行所次慰勞攸及於是厚陪鼎之數舉酬獎之制賦詩以導其意

既醉以畢其歡皆以考經義而稽古推慈惠而逮下者也

秦始皇三十四年置酒咸陽宮博士七十人前為壽蜀先主初入蜀於涪大會置酒作樂

吳大帝初為吳王歡宴之末自起行酒又嘗大會羣臣

後蜀使至羣臣並會

嘗於武昌臨釣臺飲酒又嘗宴飲於船樓也

後主每饗宴無不竟日

宋文帝元嘉四年三月宴丹徒宮帝鄉父老咸與焉

二十六年宴于丹徒宮

南齊太祖建元元年九月戊申幸宣武堂宴會詔諸王
公以下賦詩

二年三月己亥幸樂遊苑宴會王公以下賦詩

武帝永明二年七月詔曰夫樂所自生先哲垂誥禮不
忘本積代同風是以漢明遲回於南陽魏文殷勤於譙
國青溪宮體天含輝則地栖寶光定靈源允集符命在
昔期運初開經綸方遠繕築之勞我則未暇時流事往

永惟哽咽朕以寡薄嗣奉鴻基思存締構式表王迹考
星創制揆日興功子來告畢規模昭備宜申宴樂之禮
以暢感慰之懷可尅日小會八月丙午車駕幸舊宮小
會設金石樂在位者賦詩

四年正月以籍田禮畢幸閱武堂勞酒小會詔賜王公
以下在位者帛有差

五年正月戊子幸芳林園禊飲戊申車駕幸芳林園宴
九月詔九日出商飈館登高宴羣臣辛卯車駕幸商飈

館是館帝所立在孫陵崗世呼為九日臺

十二月戊子太子長子鬱林王昭業冠于東宮崇政殿
其日小會賜王公以下帛各有差

東昏侯永元二年六月庚寅車駕於樂遊苑內會如三
元京邑女人放觀

和帝中興元年五月車駕幸竹林寺禪房宴羣臣

梁高祖大同十年三月庚戌幸回賓亭宴帝鄉故老及
所經近縣奉迎候者少長數千人各賚錢二千

大清元年五月丁酉輿駕幸德陽堂宴羣臣設絲竹樂
陳高祖永定二年十二月太極殿東堂宴羣臣設金石
之樂以路寢告成也

宣帝大建七年閏九月甘露降樂遊苑丁未車駕幸樂
遊苑採甘露宴羣臣詔於苑龍舟山立甘露亭

八年四月甲寅詔曰元戎凱旋羣師振旅旌功策賞宜
有饗宴今月十七日幸樂遊苑設絲竹之樂大會文武
後主至德三年十二月辛丑釋奠于先師禮畢設金石

之樂會王公卿士

四年九月甲午輿駕幸玄武湖肆觴艦閱武宴羣臣賦

詩

東魏孝靜帝天平三年正月癸卯朔饗羣臣於前殿

北齊文宣帝天保元年七月詔曰古人鹿皮為衣書囊
成帳有懷盛德風流可想其魏朝御府所有珍竒雜綵
常所不給人者徒為畜積宜命悉出送納後園以供七

日宴賜

九年十一月登三臺御乾象殿宴羣臣並命賦詩

梁太祖開平元年五月丙申御玄德殿宴搗諸軍使劉
捍符道昭已下賜物有差是月青州許州定州三鎮節
度使請開內宴各賜方物

六月戊寅幸乾元院宴召宰臣學士及諸道入貢陪臣
二年三月幸澤州辛巳以同州節度使劉知俊為潞州
行營招討使壬午宴扈駕羣臣并勞知俊賜以金帶戰
袍寶劍茶藥

四月丁未自澤州還至懷州宴宰臣文武百官

九月丁亥西幸陳州錫宴扈從官

十月乙巳御內殿宴宰臣扈從官共四十五人丙午御毬塲殿宣夾馬都指揮使尹皓韓塘以下將士五百人賜酒食庚戌至西都御文思殿辛亥宰臣百寮起居於殿前遂宣赴內宴賜方物有差丁巳至東都壬戌御宣和殿宴宰臣文武百官

十一月辛亥御宣和殿宴宰臣文武百官以大駕還京

故也庚辰御宣和殿宴宰臣文武百官乙未又宴宰臣百官於宣和殿

三年正月甲午御文思殿宴羣臣賜金帛有差

二年丁酉宴羣臣於崇勳殿甲辰又宴羣臣於崇勳殿蓋藩臣進賀勉而從之

三月丙辰朔御崇勳殿視朝遂宴羣臣

四月車駕在河中府己亥御前殿宴宰臣及冀王友謙扈從官甲寅宴宰臣及扈從官于內殿

五月乙丑朔視朝遂命宰臣及文武百官宴于內殿己卯車駕至西京癸未御崇勲殿宴宰臣及文武百官四品己上己丑復御崇勲殿宴宰臣文武百官四品己上九月甲午宴百官於崇勲殿丙辰御崇勲殿召韓建楊涉薛貽矩趙光逢杜曉河南尹張宗奭襄州節度使楊師厚宣州節度使王景仁等賜食賜宰臣銀鞍轡馬方物銀器細茶等庚辰御崇勲殿宴宰臣及文武百官四年正月壬寅幸保寧毬場賜宴宰臣及文武百官

二月戊辰宴於金鑾殿甲戌以春時無事頻命宰臣及
勳烈宴於河南府池亭辛巳楊師厚赴鎮于陝寒食假
諸道節度使郡守勳臣競以春服賀又連清明宴以鞍
轡馬及金銀器羅綿進者迨千萬乃御宣威殿宴宰臣
及文武官四品已上

三月壬辰幸崇政院宴勳臣已亥幸天驥院宴侍臣壬
寅幸甘水亭宴宰臣勳烈翰林學士辛亥宴宰臣於內
殿丙辰於興安球場大饗六軍樂春時也

四月乙丑宴崇政院帝在藩及踐祚勵精求理深戒逸樂未常命堂上歌舞是日止令內妓昇階擊鼓弄曲甚懽至午而罷

七月壬子宴宰臣河南尹翰林學士兩街使于甘水亭丙辰宴羣臣於宣威殿

八月西征庚午次陝府辛未宴本府節度使楊師厚及扈從官于行宮賜師厚帛千匹仍授西路行營招討使丙子宴文武從官軍使已下設龜茲樂

九月甲午至西京乙卯宴會羣臣于宣威殿

十月己卯以新修天驥院開宴落成內外并獻馬而魏博進絹四萬疋為駟價

壬午以冬設禁軍幸興安鞠場召文武百官宴

十一月辛卯宴文武四品已上于宣威殿庚戌幸左龍虎軍宴羣臣甲寅幸右龍虎軍宴羣臣

十二月辛酉宴文武四品已上于宣威殿

五年三月丙申幸甘水亭召宰臣翰林學士尚書侍郎

孔續已下八人扈從宴樂甚歡戊戌幸右龍虎軍召文
武官四品已上宴於新殿甲辰幸左龍虎軍新殿宴文
武官四品已上

四月丁卯幸龍虎門召宰臣學士金吾上將軍大將軍
侍宴廣化寺丁丑幸宣威殿宴文武官四品已上及軍
使蕃客已卯又幸左龍虎軍宴羣臣

乾化元年五月甲申朔大赦改元宴於宣威殿壬辰宴
河南尹翰林學士軍使於宣威殿

八月癸亥詔宰臣文武百寮宴於河南府

九月己丑宴羣臣於興安殿

十月幸相州癸亥令諸軍指揮使及四番將軍賜食於
行宮之外廡戊辰幸邑西之白龍潭潭水亘千許步南
北五之一焉風瀾折岸遼然有江湖之狀潭之北立神
祠前亭宇弘敞下植波際帝登臨凝覽宸旨舒悅即命
丞相與翰林大學士侍膳於方右又命魚舫數十以釣
網進觀獻焉

十一月甲申至黎陽縣乙酉命從官丞相已下宴於行
次

二年二月庚戌中和節御崇勲殿召丞相大學士河南
尹略封訖於萬春門外廡賜以酒食

是月庚申御宣威殿開宴丞相洎文武官屬咸被召列
侍竟日而罷

三月北巡還至貝州辛卯詔丞相翰林大學士文武從
官都招討使及諸軍都指揮使等賜食於行殿壬辰命

以羊酒等各賜從官已未次黎陽縣東都留守官吏奉表起居賜丞相從官酒食有差已已至東都博王友文以新創食殿上言并進準備內安錢三千貫銀器一千五百兩辛未宴于食殿召丞相及文武從官等侍焉

慶賜

傳曰行慶施惠罔有不當孟子有言曰推恩足以保四海古之令王何莫由茲道也自嬴氏力政并吞諸夏申詔爵之典弛羣飲之禁逮氣王南紀時更五代元魏之

季高齊嗣興莫不因事以大賚昭德以行賞或進位以
寵文武版授以尊書艾恤民之隱則有穀帛之賜與人
同樂則有牛酒之惠至於善人女子亦以霑及逮夫朱
梁率由是矣其或折俎之宴有束帛之賚蓋伐木之詩
所謂將其厚意者也

秦始皇二十五年五月天下大酺

周禮族師掌春秋祭酺為人物災害之神

陳留俗三月上巳
臨水飲食為酺

二十六年更名民曰黔首

黔黎黑也

大酺

二十七年賜爵一級

三十一年十二月更名臘曰嘉平賜黔首里六石米二
羊

三十六年徙民於北河榆中拜爵一級

吳大帝黃龍元年四月即皇帝位是日將吏皆進爵加
賞

景帝永安元年十一月詔位詔曰諸將吏奉迎陪位在
永昌亭者皆加位一級

宋高祖永初元年六月即位改元大赦賜民爵二級鰥寡孤獨不能自存者人穀五斛

少帝景平元年正月己亥朔大赦改元文武進位二等文帝即位初文武賜位二等

元嘉六年三月立皇太子劭為皇子賜文武位一等十四年南郊大赦文武賜位一等孤老六疾不能自存者人賜穀五斛

十七年十月大赦天下文武賜爵一級

二十四年春大赦文武賜位一等繫降宥諸逋負寬減各有差孤老六疾不能自存者賜穀五斛

是年以林邑所獲金銀寶物班賚各有差

二十六年幸丹徒詔二千石官長並勤勞王務宜有沾錫

孝武孝建元年正月立皇子子業為皇太子賜天下為父後者爵一級孝子順孫義夫節婦粟帛各有差七月大赦賜文武爵一級

大明二年詔曰先帝靈命初興龍飛西楚歲紀浸遠感
往纏心奉迎文武情深常隸思弘殊澤以申永懷吏身
可賜爵一級軍戶免為平民

三年七月大赦孝子順孫義夫節婦賜帛各有差

四年車駕躬耕籍田大赦天下力田之民隨才叙用孝
悌義順賜爵一級孤老貧疾人穀十斛籍田職司優沾
重賚百姓之糧種隨宜貸給吏宣勸有章者詳加褒進
六年正月祠南郊大赦天下孝子順孫義夫悌弟賜爵

一級慈姑節婦及孤老六疾賜帛五疋穀十斛

七年二月車駕巡南豫南兗二州賜民爵一級女子百戶牛酒刺守邑宰及民夫從蒐者普加沾賚又詔蠲歷陽郡租輸三年遣使巡慰問民疾苦鰥寡孤老六疾不能自存者厚賜粟帛

十月壬寅太子冠賜王公以下帛各有差

十二月行幸歷陽郡賜女子百戶牛酒高年孤疾賜帛十疋

前廢帝永光元年八月誅太宰江夏王義恭等改元景和文武賜位二等

景和元年皇子生少府劉勝之子也大赦天下賜為父後者爵一級

明帝即位初大赦天下改泰始元年賜民爵二級鰥寡孤獨不能自存者人穀五斛

二年既討平江郢荆雍湘五州六軍解嚴大赦天下賜民爵一級

五年車駕躬耕籍田大赦天下賜力田爵一級

後廢帝元徽二年加元服大赦天下賜民男子爵一級
為父後及三老孝悌力田爵二級鰥寡孤獨篤癘不能
自存者穀五斛年八十以上加帛一疋大酺五日賜王
公以下有差

是年江州刺史桂陽王休範舉兵反討平之詔京邑二
縣埋藏所殺賊并戰死者復同京城是日解嚴大赦天
下文武賜位一等

四年正月車駕躬耕籍田大赦天下賜力田爵一級
順帝元徽五年七月即位大赦天下賜文武位二等
南齊太祖建元元年四月受禪大赦賜民爵二級文武
位二等鰥寡孤獨不能自存者穀人五斛

六月詔諸將及客戮力艱難盡勤直衛其從還宮者普
賜位一階

武帝永明二年八月幸舊宮領宮職司詳賜幣帛

四年閏正月辛亥籍田詔孝悌力田詳授爵位孤老貧

窮賜穀十石甲寅幸閱武堂勞酒小會詔賜王公以下
在位者帛有差

是年三月國子學講孝經車駕幸學賜國子祭酒博士
助教絹各有差

五年十一月戊子皇孫冠於東宮崇政殿其日小會賜
王公已下帛各有差

十一年四月立皇太孫詔賜天下為父後者爵一級孝
子順孫義夫節婦粟帛各有差

明帝建武元年立皇太子寶卷詔天下孝子順孫義夫節婦普加甄賜明揚表其衡閭賚以束帛

二年寢廟成詔監作長師可賜位一等役身遺假一年非役者蠲租同假

三年皇太子冠賜王公已下帛各有差為父後者賜爵一級

四年四月改元永泰文武加位二等

梁武帝普通元年正月改元賜文武勞位孝弟力田爵

一級尤貧之家勿收常調鰥寡孤獨并加贍卹

三年八月辛酉作二郊及籍田并畢班賜工匠各有差
四年二月乙亥籍田詔孝弟力田賜爵一級預耕之司
尅日勞酒三日

大通元年正月辛未詔孝悌力田賜爵一級

中大通元年正月辛酉輿駕親祠南郊大赦天下孝悌
力田賜爵一級

三年七月乙亥立晉安王綱為皇太子大赦天下為父

後者及出處忠孝文武清勤并賜爵一級

五年正月辛卯輿駕親祠南郊大赦天下孝悌力田賜

爵一級

六年二月癸亥輿駕親耕籍田大赦天下孝悌力田賜

爵一級

大同三年正月辛丑輿駕親祠南郊大赦天下孝悌力

田賜爵一級

五年正月辛未輿駕親祠南郊詔孝悌力田及州閭鄉

黨稱孝為善人者各賜爵一級並勒所屬即時騰上

十年三月駕幸蘭陵謁建寧陵至修陵壬寅詔故鄉老少
接踵遠至情貌孜孜若歸於父宜有以慰其心此并可
賜位一階并加頒賚內外從官軍主左右錢米各有差
癸卯詔在園陵職司恭事勤勞并賜位一級并加沾賚
是月幸回賓亭宴帝鄉故老及所經近縣奉迎候者少
長數千人各賚錢二千

中大通元年四月大赦改元孝悌力田為父後者賜爵

一級賚宿衛文武各有差

太清元年四月丁亥輿駕自同泰寺還宮大赦改元孝
悌力田為父後者賜爵一級在朝羣臣宿衛文武并加
班賚

元帝承聖元年十一月即位大赦改元内外文武賜位一
等

敬帝太平元年九月壬子改元孝悌力田賜爵一級
陳高祖永定元年十月禪授大赦改元賜民爵二級文

武二等鰥寡孤獨不能自存者人穀五斛

文帝永定三年六月即位詔文武內外量加爵叙孝悌力田為父後者賜爵一級

九月立皇太子伯宗王公已下賜帛各有差

天嘉元年正月癸丑大赦改元孝悌力田殊行異等加爵一級辛丑輿駕祠南郊賜民爵一級

三年正月初祠南郊詔曰朕負荷寶圖亟回星琯兢兢業業庶幾治定而德化不孚俗弊滋甚永言念之無忘

日夜陽和布氣昭事上玄躬奉牲玉誠兼饗敬思與黎
元被斯寬惠可普賜民爵一級其孝悌力田別加優恤
七月己丑皇太子納妃王氏在位文武賜帛各有差孝
悌力田為父後者賜爵二級

六年正月甲午皇太子加元服王公以下賜帛各有差
孝悌力田為父後者賜爵一級鰥寡孤獨不能自存者
人穀五斛

太康元年四月乙卯皇孫至澤生在位文武賜絹帛各

有差為父後者賜爵一級

廢帝光大元年正月大赦改元孝悌力田賜爵一級

七月戊申立皇太子至澤為皇太子賜天下為父後者爵一級王公已下賚帛各有差

宣帝大建元年正月甲午即位大赦改元在位文武賜爵一階孝悌力田及為父後者賜爵一級異等殊才并加策序鰥寡孤獨不能自存者人賜穀五斛

七月辛卯皇太子納妃王公已下賜帛有差

五年二月己丑皇孫生詔曰皇孫載誕國祚方熙思與羣臣共同斯慶內文武賜帛各有差為父後者賜爵

一級

後主大建十四年正月丁巳即位大赦在位文武及孝悌力田為父後者并賜爵一級鰥寡孤獨不能自存者賜穀人五斛帛二疋

四月丙子立永康公為皇太子賜天下為父後者爵一級王公已下賚帛各有差

至德二年七月壬午太子加元服在位文武賜帛各有
差孝悌力田為父後者各賜爵一級鰥寡癯老不能自
存者人穀五斛

東魏孝靜帝天平三年五月賜鰥寡孤獨貧窮者衣服
各有差

興和元年十月以新宮成大赦改元年八十以上賜綾
帽及杖七十已上賜帛及有廢疾者各賜帛粟

二年正月徙新宮大赦內外百官普進一級營構主將

別優一階

北齊文宣帝天保元年五月受禪南郊禮畢大赦改元百官進階男子賜爵鰥寡六疾義夫節婦旌賞有差

九年十一月以新宮成丁酉大赦内外文武竝進一大級

廢帝天保十年十一月癸酉即位大赦内外百官普加進級

孝昭帝皇建元年十一月立世子百年為太子賜天下

為父後者爵一級

武成帝河清元年正月以子緯為皇太子大赦內外百官并加進級諸為父後者賜爵一級

後主天統三年二月帝加元服大赦九州職人各進四級內外百官并進二級

武平元年六月以皇子生大赦內外百官并進二級九州職人并進四級

梁太祖開平元年四月己未將受唐禪賜文武百官一

百六十人本色衣一副丁卯大酺賞賜有差

二年十一月戊子賜文武百官帛

三年正月賜南郊行事官禮儀使趙光逢已下分物甲
午上御文思殿宴羣臣賜金帛有差甲申賜文武官帛
有差命宣徽使王殷押絹一萬疋并茵褥圖幣二百六
十件賜張宗奭

九月御崇勲殿宴羣臣文武百官賜張宗奭楊師厚白
綾各三百疋銀鞍轡馬丁酉上幸崇政院宴內臣賜院

使敬翔直學士李班等繒綵有差

四年正月壬寅幸保寧球場宴宰臣及文武百官賜宰臣張宗奭已下分物有加賜廣王分物

七月丙辰宴羣臣於宣威殿賜物有差

八月車駕西征次陝府丙子宴文武從官軍使已下設龜茲樂賜物有差

五年三月丙申幸甘水亭召宰臣翰林學士尚書侍郎孔續已下八人扈從宴樂上甚歡賜物有差

四月丁卯幸龍門召宰臣學士金吾上將軍大將軍侍
宴于廣化寺賜物有差

乾化元年五月甲申朔大赦改元詔方伯州牧近未加
恩者并遷爵秩復大賚軍旅溥宴于宣威殿賜帛各有
差

三年四月幸魏州之金波亭賜宰臣文武官及大學士
羊酒有差

末帝龍德元年正月改元詔曰郊裡大禮舊有渥恩御

殿改元比無賞給今則不循舊例別示特恩其行營將士賞賚已給付本家宜令招討使霍彥威副招討使王彥章陳州行營都指揮使張漢傑曉示諸軍知悉

納貢獻

天子制貢職所以均財用諸侯歸時事所以陳藝極式明上下之序聿成經久之法昔漢室淪覆三國鼎峙孫劉而下據有江吳北齊朱梁奄宅中土而皆懋宣法式寵綏遐邇故藩服之長中外之臣莫不遵時會之文修

任土之貢亦有獻瑞物而贄寶器者咸用論次焉

吳大帝漢建安末為吳侯安遠將軍領交趾太守士燮每遣使致雜香細葛輒以千數明珠大貝琉璃翡翠玳瑁犀象之珍奇物異果蕉椰龍眼之屬無歲不至燮弟合浦太守一時貢馬凡數百匹帝輒為書厚加寵賜以荅慰之

嘉禾元年十月魏遼東太守公孫淵遣使稱藩并獻貂馬帝大悅加淵爵位

宋明帝泰始四年二月丙申豫章望蔡獲古銅鐘高一尺七寸太守張辯以獻

南齊武帝永明五年益州刺史始興王鑑獻龍角一枝長九尺三寸紅色有文

六年七月齊郡太守劉元寶於郡城塹得錢三十七萬徑一寸半以獻帝以為瑞班賜公卿

崔惠景為南郡內史梁南秦二州刺史又為司州刺史惠景每罷州輒資獻奉動數百萬武帝以此嘉之

梁武帝大通初陶弘景獻二丹於高祖其一嘉勝一名成勝並為佳寶

陳宣帝大建七年四月郢州獻瑞鐘

十二月南康郡獻瑞鐘

北齊文宣帝天保七年梁湘州刺史王琳獻馴象

梁太祖開平元年五月壬午保義軍節度使朱友謙進百官衣二百副其月廣州進奇寶名藥品類甚多河南尹張全義進開平元年已前羨餘錢十萬貫紬六千疋

綿三十萬兩仍請每年上供定額每歲貢絹三萬疋以
為常式荆南高季昌進瑞橘數十顆質狀百味倍勝常
貢且橘當冬熟今方仲夏時人咸異其事因稱為瑞

十月廣州進獻助軍錢二十萬又進龍腦腰帶珍珠枕
玳瑁香藥等

十一月廣州進龍形通犀腰帶金托裏含稜玳瑁器百
餘副香藥珍巧甚多

二年正月幽州劉守文進海東鷹鷂蕃馬鹽罽方物

九月福州貢玳瑁琉璃犀象器并珍玩香藥奇品海味
色類良多價累千萬

十一月諸道節度刺史各進賀冬田器鞍馬綾羅等

三年四月幽州節度使劉守光進蕃中生異馬一匹鞍
後毛長五寸名烏龍兩浙節度使錢鏐進睦州大茶三
百一十籠洞牙弩百枝桐木槍二千條賜進奉使紀君
武銀帛有差是年冬諸道節度使刺史咸貢鞍馬銀絹

羅綺賀正

四年五月自朔日至癸巳內外以午日奉獻巨萬計馬

三千蹄餘稱是復相率助修內壘

時南北征伐版籍未
有定賦帝每議營造

及節序無不咸獻而南方數鎮入相
調外山澤魚鹽之利罕籍於縣官矣

七月福州貢方物獻桐皮扇廣州貢犀玉獻船上蕃薇
水

十月己卯新修天驥院帝開宴落成內外并獻馬而魏
博進絹四萬疋以為駟價

乾化元年兩浙進大方茶二萬觔琢畫宮衣五百副廣

州貢犀象奇珍及金銀等其估數千萬安南兩使留後
曲美進筒中蕉五百疋龍腦鬱金各五瓶他海貨等有
差又進南蠻通好金器六物銀器十二并乾陲綾花緞
越跣等雜織奇巧者各三十件福建進戶部多支權課
葛三萬五千疋

二年四月廣州獻金銀犀牙雜寶貨及名香等合估數
千萬是月客省引進使韋堅使廣州廻以銀茶上獻其
估凡五百餘萬福建進供御金花銀器一百件各五千

兩是年天下郡國各助郊天及賀正獻相次而至

冊府元龜卷一百九十七